

Muy pronto

Banda procedente di Hulanda na Aruba



ORANJESTAD(AAN) -- Actualmente ta na Aruba managing director di un banda Hulandes, Robert Thiel, kende ta haciendo tur e preparacionnan necesario pa asina por trece su banda Aruba pa henter temporada di carnaval.

Actualmente Thiel ta buscando diferente presentacion pa asina mira si esakinan ta cubri e gastonan envolvi.

DIARIO a entrevista Robert Thiel kende a duna di conoce cu e banda ta hiba e nomber "Los Bravos" cu ta consisti di 7 integrante.

Ta asina cu tres di e integrantenan ta Arubiano mientras cu e resto ta Hulandes.

Robert Thiel a duna di conoce na DIARIO cu antes e tabata tin e grupo "Sensacion Latina" y tur e integrantenan ta Arubano. Notable tabata cu e grupo aki a yega si actua den e programa "Leu for di cas".

Thiel a sigui bisa cu despues el a dicidi di lanta un otro banda "Los Bravos". E banda aki ta conta cu tres Hulandes cu ta bishitando un Conservatorium di musica na Hulanda.

Ta asina cu e Hulandesnan aki tabata hopi interesa den musica di Sur America y pa tal motibo Thiel a acerca nan y actualmente nan ta formando parti di e banda.

Notable ta cu e banda aki, cu ta toca entre otro wals y tumba na papiamento, a haci hopi propaganda pa Aruba durante nan gira na Europa.

E reaccion tabata increíble, actualmente por bisa cu merengue, kadans y tumba a pega manera un bals na Hulanda.

"Los Bravos" a graba un maxi single ariba un cassette. E cassette tin un cancion na papiamento "Dushi Carnaval" di Martin Quandus y canta pa Robert Thiel y un cancion Hulandes "Hup hup" canta pa Albert Alberts, yiu di e conocido futbolista Jonco Alberts.

Thiel ta spera di haya cooperacion di pueblo Arubano cu sa di aprecia loke Arubianonan a produci na Hulanda. Thiel a spera a haya cooperacion di SAC y otro instancianan.

Por yama Thiel na 32019 pa cualkier informacion pa asina reserva e banda cu ta depende di presentacion pa cubri e gastonan. Notable ta cu "Los Bravos" tin su propio trailer y actualmente ta buscando un sponser.

Ariba e foto di robez pa drechi por presencia: Kurt Zoneveld kende ta blaas trompet; Robert Thiel, piano; Jan de Lange, tr. bone; Peter Broekhuize, sax; Efi Thiel, key board y electric percussion; Albert Alberts, bass y cantante. E grupo tambe ta conta cu Quiermo Steden kende tambe ta encarga cu percussion. Steden pa motibonan imprevisto no por tabata presente na momento cu e foto aki a worde saca.